

四庫全書

史部

欽定四庫全書

史部
繹史卷九十六上

詳校官檢討臣羅國俊

編修臣裴謙覆勘

覆校官博士臣劉光第

校對官中書臣毛鳳儀

謄錄監生臣王增賢

欽定四庫全書

經史卷九十六上

靈璧縣知縣馬驕撰

越滅吳上

越絕書昔者吳王闔廬始得子胥之時甘心以賢之以為上客曰聖人前知乎千歲後視萬世深問其國世何昧昧得無衰極子其精焉寡人垂意聽子之言子胥唯唯不對王曰子其明之子胥曰對而不明恐獲其咎王曰願一言之以試直士夫仁者樂知者好誠秉禮者探

幽索隱明告寡人子胥曰難乎言哉邦其不長王其圖
之存無忘傾安無忘亡臣始入邦伏見衰亡之證當霸
吳厄會之際後王復空王曰何以言之子胥曰後必將
失道王食禽肉坐而待死佞諂之臣將至不久安危之
兆各有明紀虹蜺牽牛其異女黃氣在上青黑于下太
歲八會壬子數九王相之氣自十一倍死由無氣如法
而止太子無氣其異三世日月光明歷南斗吳越為鄰
同俗并土西州大江東絕大海兩邦同城相亞門戶憂

在於斯必將為咎越有神山難與為鄰願王定之毋洩
臣言 范蠡其始居楚也生於宛橐或伍戶之虛其為
結僮之時一癡一醒時人盡以為狂然獨有聖賢之明
人莫可與語以內視若盲反聽若聾大夫種入其縣知
有賢者未覩所在求邑中不得其邑人以為狂夫多賢
士衆賤有君子汎求之焉得蠡而說乃從官屬問治之
術蠡修衣冠有頃而出進揖讓君子之容終日而語
疾陳霸王之道志合意同胡越相從俱見霸兆出於東

南捐其官位相要而往臣小有所虧大有所成捐止于
吳或任子胥二人以為胥在無所闢其辭種曰今將安
之蠡曰彼為我何邦不可乎去吳之越句踐賢之種躬
正內蠡出治外內不煩濁外無不得臣主同心遂霸越
邦種善圖始蠡能慮終越承二賢邦以安寧始有災變
蠡專其明可謂賢焉能屈能申 昔者范蠡其始居楚
曰范伯自謂衰賤未嘗世祿故自菲薄飲食則甘天下
之無味居則安天下之賤位復被髮佯狂不與於世謂

大夫種曰三王則三皇之苗裔也五伯乃五帝之末世也天運歷紀千歲一至黃帝之元執辰破已霸王之氣見於地户子胥以是挾弓干吳王於是要大夫種入吳此時馮同相與共戒之伍子胥在自與不能關其辭蠡曰吳越二邦同氣共俗地户之位非吳則越乃入越越王常與言盡日大夫石買居國有權辯口進曰街女不貞街士不信客歷諸侯渡河津無因自致殆非真賢夫和氏之璧求者不爭賈騏驥之材不難阻險之路闕

之邦歷諸侯無所售道聽之徒唯大王察之於是
范蠡退而不言遊於楚越之間大夫種進曰昔者市偷
自銜於晉晉用之而勝楚伊尹負鼎入殷遂佐湯取天
下有智之士不在遠近取也謂之帝王求備者亡易曰
有高世之材必有負俗之累有至智之明者必破庶衆
之議成大功者不拘於俗論大道者不合於衆唯大王
察之於是石買益疏其後使將兵於外遂為軍士所殺
子貢曰薦一言得及身任一賢得顯名傷賢喪邦蔽能

有殃負德忘恩其反形傷壞人之善毋後世敗人之成

天誅行

吳越春秋文種字子禽荆平王時為宛令之三戶之里范蠡從犬實蹲而吠之從吏恐文種慙

令人引衣而障之文種曰無障也吾聞犬之所吠者人今吾到此有聖人之氣行而求之來至於此且人身而

犬吠者謂我是人也乃下車拜蠡不為禮○今本無

左傳

昭公三十二年

夏吳伐越始用師於越也史墨曰不及四

十年越其有吳乎越得歲而吳伐之必受其凶

定公五年

越入吳吳在楚也

公羊傳於越者何越者何於越者未能以其名通也越者能以其名通也

十四年

吳伐越越子句踐禦之陳于檇李句踐患吳之

整也使死士再禽焉不動使罪人三行屬劔於頸而辭
曰二軍有治臣奸旗鼓不敏於君之行前不敢逃刑敢
歸死遂自剄也師屬之目越子因而伐之大敗之靈姑
浮以戈擊闔廬闔廬傷將指取其屨還卒於陘去攜

李七里夫差使人立於庭荀出入必謂已曰夫差而忘

越王之殺而父乎則對曰唯不敢忘三年乃報越

史記闔廬

使立太子夫差謂曰爾而忘句踐殺汝父乎對曰不敢
三年乃報越王夫差元年以大夫伯嚭為太宰習戰射
常以報越為志越絕書吳人敗於就李吳之戰地敗
者言越之伐吳未戰吳闔廬卒敗而去也卒者闔廬死

也天子稱崩諸侯稱薨大夫稱卒士稱不祿闔廬諸侯也
不稱薨而稱卒者何也當此之時上無明天子下無
賢方伯諸侯力政彊者為君南夷與北狄交爭中國不
絕如綫矣且弑君子弑父天下莫能禁止於是孔子作
春秋方據魯以王故諸侯死皆稱卒不稱薨避魯之諱
也闔廬冢在閭門外名虎丘下池廣六十步水深丈
五尺銅槨三重墳池六尺玉帛之流扁諸之劍三千方
圓之口三千時耗魚腸之劍在焉千萬人築治之取土
臨湖口築三日而白虎居上故號虎丘述異記闔廬
夫人墓中周迴八里別館洞房迤邐相屬漆燈照爛如
日月焉尤異者金哀公元年吳王夫差敗越于夫椒報攜
蠶玉燕各十餘隻元年吳王夫差敗越于夫椒報攜
李也遂入越越子以甲楯五千保于會稽使大夫種因
吳大宰嚭以行成吳子將許之伍員曰不可臣聞之樹

德莫如滋去疾莫如盡昔有過澆殺斟灌以伐斟鄩滅夏后相后緡方娠逃出自竇歸于有仍生少康焉為仍牧正碁澆能戒之澆使椒求之逃奔有虞為之庖正以除其害虞思於是妻之以二姚而邑諸綸有田一成有衆一旅能布其德而兆其謀以收夏衆撫其官職使女艾諜澆使季杼誘豷遂滅過戈復禹之績祀夏配天不失舊物今吳不如過而越大於少康或將豐之不亦難乎句踐能親而務施施不失人親不棄勞與我同壤而

世為仇讎於是乎克而弗取將又存之違天而長寇讎
後雖悔之不可食已姬之衰也日可俟也介在蠻夷而
長寇讎以是求伯必不行矣弗聽退而告人曰越十年
生聚而十年教訓二十年之外吳其為沼乎三月越及
吳平吳入越不書吳不告慶越不告敗也

國語吳王夫差起師伐越越王句踐起師逆之江大夫
種乃獻謀曰夫吳之與越唯天所授王其無庸戰夫申
胥華登簡服吳國之士於甲兵而未嘗有所挫也夫一

人善射百夫決拾勝未可成夫謀必素見成事焉而後履之不可以授命王不如設戎約辭行成以喜其民以廣侈吳王之心吾以下之於天天若棄吳必許吾成而不吾足也將必寬然有伯諸侯之心焉既罷敝其民而天奪之食安受其燼乃無有命矣越王許諾乃命諸稽郢行成於吳曰寡君句踐使下臣郢不敢顯然布幣行禮敢私告於下執事曰昔者越國見禍得臯於天王天王親趨玉趾以心孤句踐而又宥赦之君王之於越也

繫起死人而肉白骨也孤不敢忘天災其敢忘君王之
大賜乎今句踐申禍無良草鄙之人敢忘天王之大德
而思邊垂之小怨以重得臯於下執事句踐用帥二三
之老親委重臯頓顙於邊今君王不察盛怒屬兵將殘
伐越國越國固貢獻之邑也君王不以鞭箠使之而辱
軍士使寇令焉句踐請盟一介嫡女執箕帚以眩姓於
王官一介嫡男奉槃匱以隨諸御春秋貢獻不解於王
府天王豈辱裁之亦征諸侯之禮也夫諺曰狐埋之而

孤捐之是以無成功今天王既封殖越國以明聞於天下而又刈亡之是天王之無成勞也雖四方之諸侯則何實以事吳敢使下臣盡辭唯天王秉利度義焉 吳王夫差乃告諸大夫曰孤將有大志於齊吾將許越成而無拂吾慮若越既改吾又何求若其不改反行吾振旅焉申胥諫曰不可許也夫越非實忠心好吳也又非懾畏吾甲兵之彊也大夫種勇而善謀將還玩吳國於股掌之上以得其志夫固知君王之蓋威以好勝也故

婉約其辭以從逸王志使淫樂於諸夏之國以自傷也
使吾甲兵鈍弊民人離落而日以憔悴然後安受吾燼
夫越王好信以愛民四方歸之年穀時熟日長炎炎及
吾猶可以戰也為虺弗摧為蛇將若何吳王曰大夫奚
隆於越越曾足以為大虞乎若無越則吾何以春秋曜
吾軍士乃許之成將盟越王又使諸稽郢辭曰以盟為
有益乎前盟口血未乾足以結信矣以盟為無益乎君
王舍甲兵之威以臨使之而胡重於鬼神而自輕也吳

王乃許之荒成不盟

○此語似句踐反國以後事不當在哀元年也如云無庸戰則非戰

敗而棲會稽矣如云口血未乾則指會稽之盟矣且會稽行成者種也非郢也吳王曰將有大志於齊必是將伐齊時事宜在哀八九年注謂在元年姑仍其舊以俟後之君子越絕書句踐與吳戰於浙江之上石買為將者老壯長進諫曰夫石買人與為怨家與為仇貪而好利細人也無長策王而用之國必不遂王不聽遂遣之石買發行至浙江上斬殺無罪欲專威服軍中動搖將卒獨專其權士眾恐懼人不自聊兵法曰視民如嬰兒故可與赴深溪士眾魚爛而買不知尚猶峻法隆刑子胥獨見可奪之證變為奇謀或北或南夜舉火擊鼓晝陳詐兵越師潰陸政令不行背叛離還報其王王殺買謝其師號聲聞吳吳王恐懼子胥私喜越軍敗矣胥聞之孤之將殺嚭吞吳今越句踐其已敗矣君王安意越易兼也使人入問之越師請降子胥不聽越棲

於會稽之山吳退而圍之句踐喟然用種蠡計轉死為
霸一人之身吉凶更至盛衰存亡在於用臣治道萬端
要在得賢越棲於會稽日行成於吳吳引兵而去句踐
將降西至浙江待詔入吳故有雞鳴墟其入辭曰士臣
孤句踐故將士衆入為臣虜民可得使地可得有吳王
許之子胥大怒目若夜光聲若哮虎此越未戰而服天
以賜吳其逆天乎臣唯君王急割之吳不聽遂許之○
忽叙忽論其文奇古昔者吳王夫差興師伐越敗兵
就李大風發狂日夜不止車敗馬失騎士墮死大船陵
居小船沒水吳王曰寡人晝卧夢見井羸溢大與越爭
彗越將埽我軍其凶乎孰與師還此時越軍大號夫差
恐越軍入驚駭子胥曰王其勉之哉越師敗矣臣聞井
者人所飲溢者食有餘越在南火吳在北水水制火王
何疑乎風北來助吳也昔者武王伐紂時彗星出而興
周武王問太公曰臣聞以彗鬪倒之則勝胥聞災異或
吉或凶物有相勝此乃其證願大王急行是越將凶吳

將昌也馬鼻者吳伐越道逢大風車敗馬失騎士墜死正馬啼

史記句踐聞吳王夫差日夜勒兵且以報越越欲先吳未發往伐之范蠡諫曰不可臣聞兵者凶器也戰者逆德也爭者事之末也陰謀逆德好用凶器試身於所未上帝禁之行者不利越王曰吾已決之矣遂興師吳王聞之悉發精兵擊越敗之夫椒越王乃以餘兵五千入保棲於會稽吳王追而圍之越王謂范蠡曰以不聽子故至於此為之奈何蠡對曰持滿者與天定傾者與人

節事者與地卑辭厚禮以遺之不許而身與之市句踐
曰諾乃令大夫種行成於吳膝行頓首曰君王亡臣句
踐使陪臣種敢告下執事句踐請為臣妻為妾吳王將
許之子胥言於吳王曰天以越賜吳勿許也種還以報
句踐句踐欲殺妻子燔寶器觸戰以死種止句踐曰夫
吳太宰嚭貪可誘以利請閒行言之於是句踐乃以美
女寶器令種閒獻吳太宰嚭嚭受乃見大夫種於吳王
種頓首言曰願大王赦句踐之罪盡入其實器不幸不

赦句踐將盡殺其妻子燔其寶器悉五千人觸戰必有當也。嚭因說吳王曰：越以服為臣，若將赦之，此國之利也。吳王將許之。子胥進諫曰：今不滅越，後必悔之。句踐賢君，種蠡良臣，若反國將為亂，吳王弗聽。卒赦越，罷兵而歸。

國語：越王句踐即位三年而欲伐吳。范蠡進諫曰：夫國家之事，有持盈有定傾，有節事。王曰：為三者奈何？范蠡對曰：持盈者與天定，傾者與人節，事者與地。王不問蠡。

不敢言天道盈而不溢盛而不驕勞而不矜其功夫聖
人隨時以行是謂守時天時不作弗為人客人事不起
弗為之始今君王未盈而溢未盛而驕不勞而矜其功
天時不作而先為人客人事不起而創為之始此逆於
天而不和於人王若行之將妨於國家靡王躬身王弗
聽范蠡進諫曰夫勇者逆德也兵者凶器也爭者事之
末也陰謀逆德好用凶器始於人者人之所卒也淫佚
之事上帝之禁也先行此者不利王曰無是貳言也吾

已斷之矣果興師而伐吳戰於五湖不勝棲於會稽王
召范蠡而問焉曰吾不用子之言以至於此為之奈何
范蠡對曰君王其忘之乎持盈者與天定傾者與人節
事者與地王曰與人奈何范蠡對曰卑辭尊禮玩好女
樂尊之以名如此不已又身與之市王曰諾乃令大夫
種行成於吳曰請士女於士大夫女於大夫隨之
以國家之重器吳人不許大夫種來而復往曰請委管
籥屬國家以身隨之君王制之吳人許諾王曰蠡為我

守於國范蠡對曰四封之內百姓之事蠡不如種也四封之外敵國之制立斷之事種亦不如蠡也王曰諾令

大夫種守於國與范蠡入官於吳三年而吳人遣之歸

新書夫差即位乃與越人戰江上棲之會稽越王之窮至乎吃山草飲腑水易子而食於是履甕戴壁號喙告無罪呼皇天使大夫種行成於吳王吳王將許子胥曰不可越國之俗勤勞而不愠好亂勝而無禮谿微而輕絕俗好詛而倍盟放此類者鳥獸之儕徒狐狸之醜類也生之為患殺之無咎請無與成大夫種拊心嗥啼沫泣而言信割白馬而為犧指九天而為證請婦人為妾丈夫為臣百世名實因閉官為積孤身為關內諸侯世為忠臣吳王不忍結師與成越絕書會稽山上城者向踐與吳戰大敗棲其中因以下為目魚池其利不租

吳越春秋越王既棲會稽范蠡等曰臣竊見會稽之山有魚池上下二處水中有三江四瀆之流九谿六谷之廣上池宜於君王下池宜於臣民畜魚三年其利可以致千萬越國當富盈○今本無越王句踐

棲於會稽之上乃號令於三軍曰凡我父兄昆弟及國子姓有能助寡人謀而退吳者吾與之共知越國之政大夫種進對曰臣聞之賈人夏則資皮冬則資絺旱則資舟水則資車以待乏也夫雖無四方之憂然謀臣與爪牙之士不可不養而擇也譬如蓂莖時雨既至必求之今君王既棲於會稽之上然後乃求謀臣無乃後乎

句踐曰苟得聞子大夫之言何後之有執其手而與之謀遂使之行成於吳曰寡君句踐乏無所使使其下臣種不敢徹聲聞於天王私於下執事曰寡君之師徒不足以辱君矣願以金玉子女賂君之辱請句踐女女於王大夫女女於大夫士女女於士越國之寶器畢從寡君帥越國之衆以從君之師徒唯君左右之若以越國之臯為不可赦也將焚宗廟係妻孥沈金玉於江有帶甲五千人將以致死乃必有偶是以帶甲萬人以事君

也無乃即傷君王之所愛乎與其殺是人也寧其得此國也其孰利乎夫差將欲聽與之成子胥諫曰不可夫吳之與越也仇讎敵戰之國也三江環之民無所移有吳則無越有越則無吳將不可改於是吳員聞之陸人居陸水人居水夫上黨之國我攻而勝之吾不能居其地不能乘其車夫越國吾攻而勝之吾能居其地吾能乘其舟此利也不可失也已君必滅之失此利也雖悔之亦無及已越人飾美女八人納之太宰嚭曰子

苟赦越國之臯又有美於此者將進之太宰嚭諫曰嚭
聞古之伐國者服之而已今已服矣又何求焉夫差與
之成而去之句踐說於國人曰寡人不知其力之不足
也而又與大國執讎以暴露百姓之骨於中原此則寡
人之臯也寡人請更於是葬死者問傷者養生者弔有
憂賀有喜送往者迎來者去民之所惡補民之不足然
後卑事夫差官士三百人於吳其身親為夫差前馬

韓非

子句踐入官於吳身執干戈為吳王洗馬故能殺夫差
於姑蘇文王見罽於玉門顏色不變而武王擒紂於牧

野故曰守柔曰強越王之霸也不病官武王之王也不
害詈故曰聖人之不病也以其不病是以無病也越

絕書女陽亭者句踐入官於吳夫人從道產女此亭
養於李鄉句踐勝吳更名女陽更就李為語兒鄉

左傳吳師在陳楚大夫皆懼曰闔廬惟能用其民以敗
我於柏舉今聞其嗣又甚焉將若之何子西曰二三子
恤不相睦無患吳矣昔闔廬食不二味居不重席室不
崇壇器不彤鏤宮室不觀舟車不飾衣服財用擇不取
費在國天有菑癘親巡孤寡而共其乏困在軍熟食者
分而後敢食其所嘗者卒乘與焉勤恤其民而與之勞

逸是以民不罷勞死知不曠吾先大夫子常易之所以

敗我也今聞夫差次有臺榭陂池焉宿有妃嬙嬪御焉

一日之行所欲必成玩好必從珍異是聚觀樂是務視

民如讎而用之日新夫先自敗也已安能敗我

國語子西歎於

朝藍尹壘曰吾聞君子惟獨居思念前世之崇替與衰
殞喪於是歎其餘則不君子臨政思義飲食思禮同
宴思樂在樂思善無有歎焉今吾子臨政而歎何也子
西曰閻閻能敗吾師閻閻即世吾聞其嗣又甚焉吾是
以歎對曰子患政德之不修無患矣夫閻閻口不貪
嘉味耳不樂逸聲目不淫於色身不懷於安朝夕勤志
恤民之羸聞一善若驚得一士若賞有過必悛有不善
必懼是故得民以濟其志今吾聞夫差好罷民力以成

私好縱過而翳諫一夕之宿臺榭陂池必成六畜玩好必從夫先自敗也已焉能敗人子修德以待吳吳恃楚矣

史記句踐之困會稽也喟然歎曰吾終於此乎種曰湯繫夏臺文王囚羑里晉重耳奔翟齊小白奔莒其卒王霸由此觀之何遽不為福乎吳既赦越越王句踐反國乃苦身焦思置膽於坐坐臥即仰膽飲食亦嘗膽也曰女忘會稽之恥邪身自耕作夫人自織食不加肉衣不重采折節下賢人厚遇賓客振貧弔死與百姓同其勞

欲使范蠡治國政蠡對曰兵甲之事種不如蠡鎮撫國
家親附百姓蠡不如種於是舉國政屬大夫種而使范
蠡與大夫柘稽行成為質於吳二歲而吳歸蠡

○史不
言句踐

自入
臣吳

吳越春秋越王句踐五年五月與大夫種范蠡入臣於
吳羣臣皆送至浙江之上臨水祖道軍陳固陵大夫文
種前為祝其詞曰皇天祐助前沈後揚禍為德根憂為
福堂威人者滅服從者昌王雖牽致其後無殃君臣生

離感動上皇衆夫哀悲莫不感傷臣請薦脯行酒三觴
越王仰天太息舉杯垂涕默無所言種復前祝曰大王
德壽無疆無極乾坤受靈神祇輔翼我王厚之祉祐在
側德銷百殃利受其福去彼吳庭來歸越國觴酒既升
請稱萬歲越王曰孤承前王餘德守國於邊幸蒙諸大
夫之謀遂保前王丘墓今遭辱恥為天下笑將孤之罪
邪諸大夫之責也吾不知其咎願二三子論其意大夫
扶同曰何言之鄙也昔湯繫於夏臺伊尹不離其側文

王囚於石室太公不棄其國興衰在天存亡繫於人湯改儀而媚於桀文王服從而幸於紂夏殷恃力而虐二聖兩君屈已以得天道故湯王不以窮自傷周文不以困為病越王曰昔堯任舜禹而天下治雖有洪水之害不為人災變異不及於民豈況於人君乎大夫苦成曰不如君王之言天有厯數德有薄厚黃帝不讓堯傳天子三王臣弒其君五霸子弒其父德有廣狹氣有高下今之世猶人之市置貨以設詐抱謀以待敵不幸陷厄求

伸而已大王不覽於斯而懷喜怒越王曰任人者不辱
身自用者危其國大夫皆前圖未然之端傾敵破讎坐
招泰山之福今寡人守窮若斯而云湯文困厄後必霸
何言之違禮儀夫君子爭寸陰而棄珠玉今寡人冀得
免於軍旅之憂而復反係獲敵人之手身為傭隸妻為
僕妾往而不返客死敵國若魂魄有知愧於前君其無
知體骨棄捐何大夫之言不合於寡人之意於是大夫
種范蠡曰聞古人曰居不幽志不廣形不愁思不遠聖

人賢主皆遇困厄之難蒙不赦之恥身居而名尊軀辱而聲榮處卑而不以為惡居危而不以為薄五帝德厚無窮厄之恨然尚有泛濫之憂三守暴困之辱不離三獄之困涕泣而受寃行哭而為隸演易作卦天道祐之時過於期否終則泰諸侯並救王命見符朱鬣玄狐輔臣結髮折獄破械反國修德遂討其讎擢假海內若覆手背天下宗之功垂萬世大王屈厄臣誠盡謀夫截骨之劔無削剗之利召鐵之矛無分髮之便建策之士無

暴興之說今臣遂天文案墜籍二氣共萌存亡異處彼
興則我辱我霸則彼亡二國爭道未知所就君王之危
天道之數何必自傷哉夫吉者凶之門福者禍之根今
大王雖在危困之際孰知其非暢達之兆哉大夫計硯
曰今君王國於會稽窮於入吳言悲辭苦羣臣泣之雖
則恨悵之心莫不感動而君王何為謾辭譁說用而相
欺臣誠不取越王曰寡人將去入吳以國累諸侯大夫
願各自述吾將屬焉大夫率如曰臣聞大夫種忠而善

慮民親其知士樂為用今委國一人其道必守何順心
佛命羣臣大夫曳庸曰大夫文種者國之梁棟君之爪
牙夫驥不可與匹馳日月不可竝照君王委國於種則
萬綱千紀無不舉者越王曰夫國者前王之國孤力弱
勢劣不能遵守社稷奉承宗廟吾聞父死子代君亡臣
親今事棄諸大夫客官於吳委國歸民以付二三子吾
之由也亦子之憂也君臣同道父子共氣天性自然豈
得以在者盡忠亡者為不信乎何諸大夫論事一合一

離令孤懷心不定也夫推國任賢度功績成者君之命也
奉教順理不失分者臣之職也吾顧諸大夫以其所能
而云委質而已於乎悲哉計硯曰君王所陳者固其理
也昔湯入夏付國於文祀西伯之殷委國於一老今懷
夏將滯志在於還夫適市之妻教嗣糞除出亡之君赦
臣守禦子問以事臣謀以能今君王欲士之所志各陳
其情舉其能者議其宜也越王曰大夫之論是也吾將
逝矣願聞諸君之風大夫種曰夫內修封疆之後外修

耕戰之備荒無遺土百姓親附臣之事也大夫范蠡曰
輔危主存亡國不恥屈厄之難安守被辱之地往而必
反與君復讎者臣之事也大夫苦成曰發君之令明君
之德窮與俱厄進與俱霸統煩理亂使民知分臣之事
也大夫曳庸曰奉令受使結和諸侯通命達旨賂往遺
來解憂釋患使無所疑出不忘命入不被尤臣之事也
大夫皓進曰一心齊志上與等之下不違令動從君命
修德履義守信溫故臨非決疑君誤臣諫直心不撓舉

過列平不阿親戚不私於外推身致君終始一分臣之事也大夫諸稽郢曰望敵設陣飛矢揚兵履腹涉屍血流滂滂貪進不退二師相當破敵攻衆威凌百邦臣之事也大夫準如曰修德行惠撫慰百姓身臨憂勞動輒躬親弔死存疾救活民命蓄陳儲新食不二味國富民實為君養器臣之事也大夫計畷曰候天察地紀歷陰陽觀變參災分別妖祥日月含色五精錯行福見知吉妖出知凶臣之事也越王曰孤雖入於北國為吳窮虜

有諸大夫懷德抱術各守一分以保社稷孤何憂焉遂
別於浙江之上羣臣垂泣莫不咸哀越王仰天歎曰死
者人之所畏若孤之聞死其於心胸中會無怵惕遂登
船徑去終不返顧越王夫人乃據船哭顧烏鵲啄江渚
之蝦飛去復來因哭而歌之曰仰飛鳥兮烏鳶凌玄虛
兮翩翩集洲渚兮優恣啄蝦矯翮兮雲閒任厥兮往還
妾無罪兮負地有何辜兮譴天颿颿獨兮西徃孰知返
兮何年心惛惛兮若割淚泫泫兮雙懸又哀吟曰彼飛

鳥兮鳶鳥已迴翔兮翕蘓心在專兮素蝦何居食兮江
湖徊復翔兮游颺去復返兮於乎始事君兮去家終我
命兮君都終來遇兮何辜離我國兮去吳妻衣褐兮為
婢夫去冕兮為奴歲遙遙兮難極冤悲痛兮心惻腸千
結兮服膺於乎哀兮忘食願我身兮如鳥身翱翔兮矯
翼去我國兮心搖情憤惋兮誰識越王聞夫人怨歌心
中內慟乃曰孤何憂吾之六翮備矣於是入吳見夫差
稽首再拜稱臣曰東海賤臣句踐上愧皇天下負后土

不裁功力污辱王之軍士抵罪邊境大王赦其深辜裁
加役臣使執箕帚誠蒙厚恩得保須臾之命不勝仰感
俯愧臣句踐叩頭頓首吳王夫差曰寡人於子亦過矣
子不念先君之讎乎越王曰臣死則死矣惟大王原之
伍胥在旁目若燦火聲如雷霆乃進曰夫飛鳥在青雲
之上尚欲繳微矢以射之豈况近臥於華池集於庭廡
乎今越王放於南山之中游於不可存之地幸來涉我
壤土入吾桎梏此乃厨宰之成事食也豈可失之乎吳

王曰吾聞誅降殺服禍及三世吾非愛越而不殺也畏
皇天之咎教而赦之太宰嚭諫曰子胥明於一時之計
不通安國之道願大王遂其所執無拘羣小之口夫差
遂不誅越王令駕車養馬秘於宮室之中三月吳王召
越王入見越王伏於前范蠡立於後吳王謂范蠡曰寡
人聞貞婦不嫁破亡之家仁賢不官絕滅之國今越王
無道國已將亡社稷壞崩身死世絕為天下笑而子及
主俱為奴僕來歸於吳豈不鄙乎吾欲赦子之罪子能

改心自新棄越歸吳乎范蠡對曰臣聞亡國之臣不敢
語政敗軍之將不敢語勇臣在越不忠不信今越王不
奉大王命號用兵與大王相持至今獲罪君臣俱降蒙
大王鴻恩得君臣相保願得入備埽除出給趨走臣之
願也此時越王伏地流涕自謂遂失范蠡矣吳王知范
蠡不可得為臣謂曰子既不移其志吾復置子於石室
之中范蠡曰臣請如命吳王起入宮中越王范蠡趨入
石室越王服犢鼻着樵頭夫人衣無緣之裳施左闔之

樵夫斫養馬妻給水除糞灑埽三年不愠怒面無恨色吳王登遠高望見越王及夫人范蠡坐於馬糞之旁君臣之禮存夫婦之儀具王顧謂太宰嚭曰彼越王者一節之人范蠡一介之士雖在窮厄之地不失君臣之禮寡人傷之太宰嚭曰願大王以聖人之心哀窮孤之士吳王曰為子赦之後三月乃擇吉日而欲赦之召太宰嚭謀曰越之與吳同土連域句踐愚黠親欲為賊寡人承天之神靈前王之遺德誅討越寇囚之石室寡人

心不忍見而欲赦之於子奈何太宰嚭曰臣聞無德不復大王垂仁恩加越越豈敢不報哉昔者齊桓割燕所至之地以貺燕公而齊君獲其美名宋襄濟河而戰春秋以多其義功立而名稱君敗而德存今大王誠赦越王則功冠於五霸名越於前古吳王曰待吾疾愈方為太宰赦之後一月越王出石室召范蠡曰吳王疾三月不愈吾聞人臣之道主疾臣憂且吳王遇孤恩甚厚矣疾之無瘳惟公卜焉范蠡曰吳王不死明矣到己巳日

當瘳惟大王留意越王曰孤所以窮而不死者賴公之策耳中復猶豫豈孤之志哉可與不可惟公圖之范蠡曰臣竊見吳王真非人也數言成湯之義而不行之願大王請求問疾得見因求其糞而嘗之觀其顏色當拜賀焉言其不死以瘳起日期之既言信後則大王何憂越王明日謂太宰嚭曰囚臣欲一見問疾太宰嚭即入言於吳王王召而見之適遇吳王之使太宰嚭奉洩惡以出逢戶中越王因拜請嘗大王之洩以決吉凶即以

手取其便與惡而嘗之因入曰下囚臣句踐賀於大王王之疾至己巳日有瘳至三月壬申病愈吳王曰何以知之越王曰下臣嘗事師聞糞者順穀味逆時氣者死順時氣者生今者臣竊嘗大王之糞其惡味苦且楚酸是味也應春夏之氣臣以是知之吳王大說曰仁人也乃赦越王得離其石室去就其宮室執牧養之事如故越王從嘗糞惡之後遂病口臭范蠡乃令左右皆食岑草以亂其氣其後吳王如越王期日疾愈心念其忠臨

政之後大縱酒於文臺吳王出令曰今日為越王陳北面之坐羣臣以客禮事之伍子胥趨出到舍上不御坐酒酣太宰嚭曰異乎今日坐者各有其詞不仁者逃其仁者留臣聞同聲相和同心相求今國相剛勇之人意者內慙至仁之存也而不御坐其亦是乎吳王曰然於是范蠡與越王俱起為吳王壽其辭曰下臣句踐從小臣范蠡奉觴上千歲之壽辭曰皇在上令昭下四時并心察慈仁者大王躬親鴻恩立義行仁九德四塞威服

羣臣於乎休哉傳德無極上感太陽降瑞翼翼大王延
壽萬歲長保吳國四海咸承諸侯賓服觴酒既升永受
萬福於是吳王大說明日伍子胥入諫曰昨日大王何
見乎臣聞內懷虎狼之心外執美詞之說但為外情以
存其身豺不可謂廉狼不可謂親今大王好聽須臾之
說不慮萬歲之患放棄忠直之言聽用讒夫之語不滅
瀝血之仇不絕懷毒之怨猶縱毛爐炭之上幸弗焦投
卵千鈞之下望必全豈不殆哉臣聞桀登高自知危然

不知所以自安也前據白刃自知死而不知所以自存也惑者知返迷道不遠願大王察之吳王曰寡人有疾三月曾不聞相國一言是相國之不慈也又不進口之所嗜心不相思是相國之不仁也夫為人臣不仁不慈焉能知其忠信者乎越王迷惑棄守邊之事親將其臣民來歸寡人是其義也躬親為虜妻親為妾不愠寡人寡人有疾親嘗寡人之澁是其慈也虛其府庫盡其寶幣不念舊故是其忠信也三者既立以養寡人寡人曾

聽相國而誅之是寡人之不智也而為相國快意邪豈
不負皇天乎子胥曰何大王之言反也夫虎之卑勢將
以有擊也狸之卑身將求所取也難以眩移拘於網魚
以有說死於餌且大王初臨政負玉門之第九誠事之
敗無咎矣今年三月甲戌時加雞鳴甲戌歲位之會將
也青龍在酉德在土刑在金是日賊其德也知父將有
不順之子君有逆節之臣大王以越王歸吳為義以飲
搜食惡為慈以虛府庫為仁是故為無愛於人其不可

親面聽貌觀以存其身今越王入臣於吳是其謀深也
虛其府庫不見恨色是欺我王也下飲王之溲者是上
食王之心也下嘗王之惡者是上食王之肝也大哉越
王之崇吳吳將為所擒也惟大王留意察之臣不敢逃
死以負前王一旦社稷丘墟宗廟荆棘其悔可追乎吳
王曰相國置之勿復言矣寡人不忍復聞於是遂赦越
王歸國送於蛇門之外羣臣祖道吳王曰寡人赦君使
其返國必念終始王其勉之越王稽首曰今大王哀臣

孤窮使得生全還國與種蠡之徒願死於轂下上天蒼
蒼臣不敢負吳王曰於乎吾聞君子一言不再今已行
矣王勉之越王再拜跪伏吳王乃引越王登車范蠡執
御遂去至三津之上仰天歎曰嗟乎孤之屯厄誰念復
生渡此津也謂范蠡曰今三月甲辰時加日昃孤蒙上
天之命還歸故鄉得無後患乎范蠡曰大王勿疑直眠
道行越將有福吳當有憂至浙江之上望見大越山川
重秀天地再清王與夫人歎曰吾已絕望永辭萬民豈

料再還重復鄉國言竟掩面涕泣闌干此時萬姓咸歡
羣臣畢賀

國語反至於國王問於范蠡曰節事奈何范蠡對曰節
事者與地唯地能包萬物以為一其事不失生萬物容
畜禽獸然後受其名而兼其利美惡皆成以養生時不
至不可彊生事不究不可彊成自若以處以度天下待
其來者而止之因時之所宜而定之同男女之功除民
之害以避天殃田野開闢府倉實民衆殷無曠其衆以

為亂梯時將有反事將有閒必有以知天地之恒制乃
可以有天下之成利事無閒時無反則撫民保教以須
之王曰不穀之國家蠡之國家也蠡其圖之范蠡對曰
四封之內百姓之事時節三樂不亂民功不逆天時五
穀稔孰民乃蕃滋君臣上下交得其志蠡不如種也四
封之外敵國之制立斷之事因陰陽之恒順天地之常
柔而不屈彊而不剛德虐之行因以為常死生因天地
之刑天因人聖人因天人自生之天地形之聖人因而

成之是故戰勝而不報取地而不反兵勝於外福生於
內用力甚少而名聲章明種亦不如蠱也王曰諾令大
夫種為之

吳越春秋越王句踐臣吳至歸越句踐七年也百姓拜
之於道曰君王獨無苦矣今王受天之福復於越國霸
王之迹自斯而起王曰寡人不慎天教無德於民今勞
萬姓擁於岐路將何德化以報國人顧謂范蠱曰今十
有二月己巳之日時加禺中孤欲以此到國何如蠱曰

大王且留以臣卜日於是范蠡進曰異哉大王之擇日也王當疾趨車馳人走越王策馬飛輿遂復宮闕吳封地百里於越東至炭瀆西止周宗南造於山北薄於海越王謂范蠡曰孤獲辱連年勢足以死得相國之策再返南鄉今欲定國立城人民不足其功不可以興為之奈何范蠡對曰唐虞卜地夏殷封國古公營城周雒威折萬里德致八極豈直欲破彊敵收鄰國乎越王曰孤不能承前君之制修德自守亡衆棲於會稽之山請命

乞恩受辱被恥囚結吳宮幸來歸國追以百里之封將
遵前君之意復以會稽之上而宜釋吳之地范蠡曰昔
公劉去邠而德彰於夏亶父讓地而名發於岐今大王
欲立國樹都并敵國之境不處平易之都據四達之地
將焉立霸王之業越王曰寡人之計未有決定欲築城
立郭分設里閭欲委屬於相國於是范蠡乃觀天文擬
法於紫宮築作小城周千一百二十一步一圓三方西
北立龍飛翼之樓以象天門東南伏漏石竇以象地戶

陵門四達以象八風外郭築城而缺西北示服事吳也
不敢壅塞內以取吳故缺西北而吳不知也北向稱臣
委命吳國左右易處不得其位明臣屬也城既成而怪
山自生者琅琊東武海中山也一夕自來故名怪山范
蠡曰臣之築城也其應天矣崑崙之象存焉越王曰寡
人聞崑崙之山乃地之林上承皇天氣吐宇內下處后
土稟受無外滋聖生神嘔養帝會故帝處其陽陸三王
居其正地吾之國也偏天地之壤乘東南之維斗去極

北非糞土之城何能與王者比隆盛哉范蠡曰君徒見外未見於內臣乃承天門制城合氣於后土嶽象已設崑崙故出越之霸也越王曰苟如相國之言孤之命也范蠡曰天地卒號以著其實名東武起游臺其上東南為司馬門立增樓冠其山巔以為靈臺起離宮於淮陽宿臺在於高平駕臺在於成丘立苑於樂野燕臺在於石室齋臺在於襟山句踐之出游也休息食室於水厨越王乃召相國范蠡大夫種大夫鄂問曰孤欲以今日

上明堂臨國政專恩致令以撫百姓何日可矣惟三聖
紀綱維持范蠡曰今日丙午日也丙陽將也是日吉矣
又因良時臣愚以為可無始有終得天下之中大夫種
曰前車已覆後車必戒願王深察范蠡曰夫子故不一
二見也吾王今以丙午復初臨政解救其本是一宜夫
金制始而火救其終是二宜蓄金之憂轉而及水是三
宜君臣有差不失其理是四宜王相俱起天下立矣是
五宜臣願急升明堂臨政越王是日立政翼翼小心出

不敢奢入不敢侈越王念復吳讎非一旦也苦身勞心
夜以接日目臥則攻之以蓼足寒則漬之以水冬常抱
冰夏還握火愁心苦志懸膽於戶出入嘗之不絕於口
中夜潛泣泣而復嘯越王曰吳王好服之離體吾欲采
葛使女工織細布獻之以求吳王之心於子何如羣臣
曰善乃使國中男女入山采葛以作黃絲之布欲獻之
未及遣使吳王聞越王盡心自守食不重味衣不重綵
雖有五臺之游未嘗一日登翫吾欲因而賜之以書增

之以封東至於句甬西至於攜李南至於姑末北至於平原縱橫八百餘里越王乃使大夫種索葛布十萬甘蜜九竈文筭七枚狐皮五雙晉竹十度以復封禮吳王得之曰以越僻狄之國無珍今舉其貢貨而以復禮此越小心念功不忘吳之效也夫越本興國千里吾雖封之未盡其國子胥聞之退臥於舍謂侍者曰吾君失其石室之囚縱於南林之中今但因虎豹之野而與荒外之草於吾之心其無損也吳王得葛布之獻乃復增越

之封賜羽毛之飾几杖諸侯之服越國大說采葛之婦
傷越王用心之苦乃作苦之詩曰葛不連蔓瓮台台我
君心苦命更之嘗膽不苦甘如飴令我采葛以作絲女
工織兮不敢遲弱於羅兮輕霏霏號絺素兮將獻之越
王說兮忘罪除吳王歡兮飛尺書增封益地賜羽奇几
杖茵褥諸侯儀羣臣拜舞天顏舒我王何憂能不移於
是越王內修其德外布其道君不名教臣不名謀民不
名使官不名事國中蕩蕩無有政令越王內實府庫墾

其田疇民富國彊衆安道泰越王遂師八臣與其四友
時問政焉大夫種曰愛民而已越王曰奈何種曰利之
無害成之無敗生之無殺與之無奪越王曰願聞種曰
無奪民所好則利之民不失其時則成之省刑去罰則
生之薄其賦斂則與之無多臺游則樂之靜而無苛則
喜之民失所好則害之農失其時則敗之有罪不赦則
殺之重賦厚斂則奪之多作臺游以罷民則苦之勞擾
民力則怒之臣聞善為國者遇民如父母之愛其子如

兄之愛其弟聞有饑寒為之哀見其勞苦為之悲越王
乃緩刑薄罰省其賦斂於是人民殷富皆有帶甲之勇

越絕書龜山者句踐起怪游臺也東南司馬門因以炤
龜又仰望天氣觀天怪也高四十六丈五尺二寸周五

百三十二步一日怪山怪山者往古一夜自來民怪之
故謂怪山樂野者越之弋獵處大樂故謂樂野其山

上石室句踐所休謀也東郭外南小城者句踐水室
句踐之出入也齋於稷山往從田里去從北郭門炤龜

龜山更駕臺馳於離丘遊於美人宮興樂中宿過歷馬
丘射於樂野之術走犬若邪休謀石室食於水厨領功

銓土已作昌土臺藏其形隱其情一曰水室者所以備
膳羞也北郭外路南溪北城者句踐築鼓鐘宮也

葛山者句踐罷吳種葛使越女織治葛布獻於吳王夫
差犬山者句踐罷吳畜犬獵南山白鹿欲得獻吳神

不可得故曰犬山其高為犬亭 六山者句踐鑄銅鑄
銅不樂埋之東坂其上馬筓句踐遣使者取於南社徙
種六山飾治為馬筓獻之吳 姑中山者越銅官之山
也越人謂之銅姑瀆長二百五十里 朱餘者越鹽官
也越人謂鹽曰餘 官瀆者句踐工官也 富中大塘
者句踐治以為義田為肥饒謂之富中 拾遺記初越
王入國有丹鳥夾王而飛故句踐入國起望鳥臺言丹
鳥之異也范蠡相越日致千金家僮闢筭術者萬人收
四海難得之貨盈積於越都以為器銅鐵之類積如山
之阜或藏之井塹謂之寶井奇容麗色溢于閨房謂之
遊宮歷古以來未之有也 吳越春秋越王念吳欲復
讎愁心苦志中夜抱柱而哭承之以嘯羣臣聞之曰君
王何愁心之甚也夫復讎謀敵非君
王之憂自臣下之急務也○藝文引

呂氏春秋越王苦會稽之恥欲深得民心以致必死於

吳身不安枕席口不厚甘味目不視靡曼耳不聽鐘鼓
三年苦身勞力焦唇乾肺內親羣臣下養百姓以求其
心有甘脆不足分弗敢食有酒流之江與民同之身親
耕而食妻親織而衣味禁珍衣禁襲色禁二時出行路
從車載食以視孤寡老弱之清病困窮顏色愁悴不瞻
者必身自食之

史記句踐自會稽歸七年拊循其士民士民欲用以報
吳大夫逢同諫曰國新流亡今乃復殷給繕飾備利吳

必懼懼則難必至且鷲鳥之擊也必匿其形今夫吳兵
加齊晉怨深於楚越名高天下實害周室德少而功多
必淫自矜為越計莫若結齊親楚附晉以厚吳吳之志
廣必輕戰是我連其權三國伐之越承其弊可克也句
踐曰善

吳越春秋越王召五大夫而告之曰昔者越國遁棄宗
廟身為窮虜恥聞天下辱流諸侯今寡人念吳猶躡者
不忘走盲者不忘視孤未知策謀惟大夫誨之扶同日

昔之亡國流民天下莫不聞知今欲有計不宜前露其辭臣聞猛獸將擊必弭毛帖伏鷙鳥將搏必卑飛戢翼聖人將動必順辭和衆聖人之謀不可見其象不可知其情臨事而伐故前無剽過之兵後無仗襲之患今大王臨敵破吳宜損之辭無令泄也臣聞吳王兵彊於齊晉而怨結於楚大王宜親於齊深結於晉陰固於楚而厚事於吳夫吳之志猛驕而自矜必輕諸侯而凌鄰國三國決權還為敵國必角勢交爭越承其弊因而伐之

可克也雖五帝之兵無以過此范蠡曰臣聞謀國破敵
動觀其符孟津之會諸侯曰可武王辭之方今吳楚結
讎構怨不解齊雖不親外為其救晉雖不附猶效其義
夫內臣謀而決讎其策鄰國通而不絕其援斯正吳之
興霸諸侯之上尊臣聞峻高者墮茂葉者摧日中則移
月滿則虧四時不竝盛五行不俱馳陰陽更倡氣有盛
衰故溢堤之水不淹其量燿乾之火不復其熾水靜則
無漚澗之怒火消則無熹毛之熱今吳乘諸侯之威以

號令於天下不知德薄而恩淺道狹而怨廣權懸而智衰力竭而威折兵挫而軍退士散而衆解臣請按師整兵待其壞敗隨而襲之兵不血刃士不旋踵吳之君臣為虜矣臣願大王匿聲無見其動以觀其靜大夫苦成曰夫水能浮草木亦能沈之地能生萬物亦能殺之江海能下谿谷亦能朝之聖人能從衆亦能使之今吳承闔閭之軍制子胥之典教政平未虧戰勝未敗大夫誥者狂佞之人達於策慮輕於朝事子胥力於戰伐死於

諫議二人權必有壞敗願王虛心自匿無示謀計則吳可滅矣大夫浩曰今吳君驕臣奢民飽軍勇外有侵境之敵內有爭臣之震其可攻也大夫句如曰天有四時人有五勝昔湯武乘四時之利而制夏殷桓繆據五勝之便而列六國此乘其時而勝者也王曰未有四時之利五勝之便願各就職也

左傳

七年

夏公會吳于鄆吳來徵百牢子服景伯對曰先

王未之有也吳人曰宋百牢我魯不可以後宋且魯牢

晉大夫過十吳王百牢不亦可乎景伯曰晉范鞅貪而棄禮以大國懼敕邑故敕邑十一牢之君若以禮命於諸侯則有數矣若亦棄禮則有淫者矣周之王也制禮上物不過十二以為天之大數也今棄周禮而曰必百牢亦唯執事吳人弗聽景伯曰吳將亡矣棄天而背本不與必棄疾於我乃與之大牢詔召季康子康子使子貢辭大宰嚭曰國君道長而大夫不出門此何禮也對曰豈以為禮畏大國也大國不以禮命於諸侯苟不以

禮豈可量也寡君既共命焉其老豈敢棄其國大伯端委以治周禮仲雍嗣之斷髮文身羸以為飾豈禮也哉有由然也反自鄆以吳為無能為也

越絕書昔者越王句踐近侵於彊吳遠媿於諸侯兵革散空國且滅亡乃脅諸臣而與之盟吾欲伐吳奈何有功羣臣默然而無對王曰夫主憂臣辱主辱臣死何大夫易見而難使也計倪官卑年少其居在後舉首而起曰殆哉非大夫易見難使是大王不能使臣也王曰何

謂也計倪對曰夫官位財幣王之所輕死者是士之所重也王愛所輕責士所重豈不艱哉王自揖進計倪而問焉計倪對曰夫仁義者治之門士民者君之根本也閭門固根莫如正身正身之道謹選左右左右選則孔主日益上不選則孔主日益下二者貴質浸之漸也願君王公選於衆精鍊左右非君子至誠之士無與居家使邪僻之氣無漸以生仁義之行有階人知其能官知其治爵賞刑罰一由君出則臣下不敢毀譽以言無功

者不敢干治故明主用人不由所從不問其先說取一
焉是故周文齊桓躬於任賢太公管仲明於知人今則
不然臣故曰殆哉越王勃然曰孤聞齊威淫佚九合諸
侯一匡天下蓋管仲之力也寡人雖愚唯在大夫計倪
對曰齊桓除管仲罪大責任之至易此故南陽蒼白太
公九十而不伐磻溪之餓人也聖主不計其辱以為賢
者一乎仲二乎仲斯可致王但霸何足道桓稱仲父文
稱太公計此二人曾無跬步之勞大呼之功乃忘弓矢

之怨授以上卿傳曰直能三公今置臣而不尊使賢而不用譬於門戶像設倚而相欺蓋智士所恥賢者所羞君王察之越王曰誠者不能匿其辭大夫既在何須言哉計倪對曰臣聞智者不妄言以成其勞賢者始於難動終於有成傳曰易之謙遜對過問抑威權勢利器不可示人言賞罰由君此之謂也故賢君用臣略責於絕施之職而成其功遠使以效其誠內告以匿以知其信與之講事以觀其智飲之以酒以觀其態選士以備不

肖者無所置越王大媿乃壞池填塹開倉穀貸貧乏乃使羣臣身問疾病躬視死喪不厄窮僻尊有德與民同苦樂激河泉井示不獨食行之六年士民一心不謀同辭不呼自來皆欲伐吳遂有大功而霸諸侯昔者越王句踐問大夫種曰吾欲伐吳奈何能有功乎大夫種對曰伐吳有九術王曰何謂九術對曰一曰尊天地事鬼神二曰重財幣以遺其君三曰貴糶粟橐以空其邦四曰遺之好美以為勞其志五曰遺之巧匠使起宮室

高臺盡其財疲其力六曰遺其諛臣使之易伐七曰彊其諫臣使之自殺八曰邦家富而備器九曰堅厲甲兵以承其弊故曰九者勿患戒口勿傳以取天下不難况於吳乎越王曰善於是作為策楯嬰以白壁鏤以黃金類蛇龍而行者乃使大夫種獻之於吳曰東海役臣孤句踐使者臣種敢修下吏問於左右賴有天下之力竊為小殿有餘財載拜獻之大王吳王大說申胥諫曰不可王勿受昔桀起靈門紂起鹿臺陰陽不和五穀不時

天與之災邦家空虛遂以之亡大王受之是後必有災

吳王不聽遂受之而起姑胥臺三年聚財五年乃成高

見二百里行路之人道死尸哭

吳越春秋大夫種曰夫欲報怨復讎破吳滅敵

者有九術君王察焉越王曰寡人被辱懷憂內慙朝臣外愧諸侯中心迷惑精神空虛雖有九術安能知之大夫種曰夫九術者湯文得之以王桓穆得之以霸其攻城取邑易於脫屣願大王覽之凡此九術君王閉口無傳守之以神取天下不難而況於吳乎越王曰善乃行第一術立東郊以祭陽名曰東皇公立西郊以祭陰名曰西王母祭陵山於會稽祀水澤於江州事鬼神一年國不被災越王曰善哉大夫之術願論其餘種曰吳王好起宮室用工不輟王選名山神材奉而獻之越王乃使木工十有餘人入山伐木一年師無所幸作士思歸

皆有怨望之心而歌木客之吟一夜天生神木一雙大
二十圍長五十尋陽為文梓陰為楸榘巧工施校制以
規繩雕治圓轉刻削磨礱分以丹青錯畫文章嬰以白
壁鏤以黃金狀類龍蛇文彩生光乃使大夫種獻之於
吳王曰東海役臣孤句踐使臣種敢因下吏聞於左右
賴大王之力竊為小殿有餘材謹再拜獻之吳王大說

昔者越王句踐問范子曰古之賢主聖王之治何左何
右何去何取范子對曰臣聞聖王之治左道右術去末
取實越王曰何謂道何謂術何謂末何謂實范子對曰
道者天地先生不知老曲成萬物不名巧故謂之道道
生氣氣生陰陰生陽陽生天地天地立然後有寒暑燥

溼日月星辰四時而萬物備術者天意也盛夏之時萬物遂長聖人緣天心助天喜樂萬物之長故舜彈五絃之琴歌南風之詩而天下治言其樂與天下同也當是之時頌聲作所謂耒耜者也故名過實則百姓不附親賢士不為用而外闕諸侯聖主不為也所謂實者穀闕也得人心任賢士也凡此四者邦之寶也越王曰寡人躬行節儉下士求賢不使名過實此寡人所能行也多貯穀富百姓此乃天時水旱寧在一人邪何以備之范

子曰百里之神千里之君湯執其中和舉伊尹收天下
雄雋之士練卒兵率諸侯兵伐桀為天下除殘去賊萬
民皆歌而歸之是所謂執其中和者越王曰善哉中和
所致也寡人雖不及賢主聖王欲執其中和而行之今
諸侯之地或多或少彊弱不相當兵革暴起何以應之
范子曰知保人之身者可以王天下不知保人之身失
天下者也越王曰何謂保人之身范子曰天生萬物而
教之而生人得穀即不死穀能生人能殺人故謂人身

越王曰善哉今寡人欲保穀為之奈何范子曰欲保必親於野覩諸所多少為備越王曰所少可得為因其貴賤亦有應乎范子曰夫八穀貴賤之法必察天之三表即決矣越王曰請問三表范子曰水之勢勝金陰氣蓄積大盛水據金而死故金中有水如此者歲大敗八穀皆貴金之勢勝木陽氣蓄積大盛金據木而死故木中有火如此者歲大美八穀皆賤金木水火更相勝此天之三表者也不可不察能知三表可為邦寶不知三

表之君千里之神萬里之君故天下之君發號施令必
順於四時四時不正則陰陽不調寒暑失常如此則歲
惡五穀不登聖主施令必審於四時此至禁也越王曰
此寡人所能行也願欲知圖穀上下貴賤欲與他貨之
內以自實為之奈何范子曰夫八穀之賤也如宿穀之
登其明也諦審察陰陽消息觀市之反覆雌雄之相逐
天道乃畢越王問范子曰何執而昌何行而亡范子曰
執其中則昌行奢侈則亡越王曰寡人欲聞其說范子

曰臣聞古之賢主聖君執中和而原其終始即位安而萬物定矣不執其中和不原其終始即尊位傾萬物散文武之業桀紂之跡可知矣古者天子及至諸侯自滅至亡漸漬乎滋味之費沒溺於聲色之類牽纏於珍怪貴重之器故其邦空虛困其士民以為須臾之樂百姓皆有悲心瓦解而倍畔者桀紂是也身死邦亡為天下笑此謂行奢侈而亡也湯有七十里地務執三表可謂邦寶不知三表身死棄道越王問范子曰春肅夏寒秋

榮冬泄人治使然乎將道也范子曰天道三千五百歲
一治一亂終而復始如環之無端此天之常道也四時
易次寒暑失常治民然也故天生萬物之時聖人命之
曰春春不生遂者故天不重為春春者夏之父也故春
生之夏長之秋成而殺之冬受而藏之春肅而不生者
王德不究也夏寒而不長者臣下不奉主命也秋順而
復榮者百官刑不斷也冬溫而泄者發府庫賞無功也
此所謂四時者邦之禁也越王曰寒暑不時治在於人

可知也。願聞歲之美惡。穀之貴賤。何以紀之。范子曰。夫陰陽錯繆。即為惡歲。人生失治。即為亂世。夫一亂一治。天道自然。八穀亦一賤一貴。極而復反。言亂三千歲。必有聖王也。八穀貴賤更相勝。故死凌生者。逆。大貴生凌死者。順。大賤。越王曰。善。越王問於范子曰。寡人聞人失其魂魄者。死得其魂魄者。生物皆有之。將人也。范子曰。人有之。萬物亦然。天地之間。人最為貴物。之生穀為貴。以生人與魂魄無異。可得豫知也。越王曰。其善惡可得。

聞乎范子曰欲知八穀之貴賤上下衰極必察其魂魄
視其動靜觀其所舍萬不失一問曰何謂魂魄對曰魂
者橐也魄者生氣之源也故神生者出入無門上下無根
見所而功自存故名之曰神神主生氣之精魄主死氣
之舍也魄者主賤魂者主貴故當安靜而不動魂者方
盛夏而行故萬物得以自昌神者主氣之精主貴而雲
行故方盛夏之時不行則神氣槁而不成物矣故死凌
生者歲大敗生凌死者歲大美故觀其魂魄即知歲之

善惡矣越王問於范子曰寡人聞陰陽之治不同力而
功成不同氣而物生可得而知乎願聞其說范子曰臣
聞陰陽氣不同處萬物生焉冬三月之時草木既死萬
物各異藏故陽氣避之下藏伏壯於內使陰陽得成功
於外夏三月盛暑之時萬物遂長陰氣避之下藏伏壯
於內然而萬物親而信之是所謂也陽者主生萬物方
夏三月之時大熱不至則萬物不能成陰氣主殺方冬
三月之時地不內藏則根莖不成即春無生故一時失

度即四序為不行越王曰善寡人已聞陰陽之事穀之
貴賤可得而知乎范子曰陽者主貴陰者主賤故當寒
而不寒者穀為之暴貴當溫而不溫者穀為之暴賤譬
猶形影聲響相聞豈得不復哉故曰秋冬貴陽氣施於
陰陽極而復貴春夏賤陰氣施於陽陽極而不復越王
曰善哉以丹書帛置之枕中以為國寶越五日困於吳
請於范子曰寡人守國無術負於萬物幾亡邦危社稷
為旁邦所議無定足而立欲捐軀出死以報吳讎為之

奈何范子曰臣聞聖主為不可為之行不惡人之謗已
為足舉之德不德人之稱已舜循之歷山而天下從風
使舜釋其所循而求天下之利則恐不全其身昔者神
農之治天下務利之而已矣不望其報不貪天下之財
而天下共富之所以其智能自貴於人而天下共尊之
故曰富貴者天下所置不可奪也今王利地貪財接兵
血刃僵屍流血欲以顯於世不亦謬乎越王曰上不逮
於神農下不及於堯舜今子以至聖之道以說寡人誠

非吾所及也且吾聞之也父辱則子死君辱則臣死今寡人親已辱於吳矣欲行一切之變以復吳讎願子更為寡人圖之范子曰君辱則死固其義也立死下士人而求成邦者上聖之計也且夫廣天下尊萬乘之主使百姓安其居樂其業者唯兵兵之要在於人人之要在於穀故民衆則王安穀多則兵彊王而備此二者然後可以圖之也越王曰吾欲富邦彊兵地狹民少奈何為之范子曰夫陽動於上以成天文陰動於下以成地理審

察開置之要可以為富凡欲先知天門開及地戶閉其
術天高五寸減天寸六分以成地謹司八穀初見出於
天者是謂天門開地戶閉陽氣不得下入地戶故氣轉
動而上下陰陽俱絕八穀不成大貴必應其歲而起此
天變見符也謹司八穀初見入於地者是謂地戶閉陰
陽俱會八穀大成其歲大賤來年大饑此地變見端也
謹司八穀初見半於人者糴平熟無災害故天倡而見
符地應而見瑞聖人上知天下知地中知人此之謂天

平地平以此為天圖

漢書兵權謀范蠡二篇大夫種二篇

昔者越王句

踐既得反國欲陰圖吳乃召計倪而問焉曰吾欲伐吳恐弗能取山林幽冥不知利害所在西則迫江東則薄海水屬蒼天下不知所止交錯相過波濤濬流沈而復起因復相還浩浩之水朝夕既有時動作若驚駭聲音若雷霆波濤援而起船失不能救不知命之所維念樓船之苦涕泣不可止非不欲為也時返不知所在謀不成而息恐為天下咎以敵攻敵未知誰負大邦既已備

小邑既已保五穀既已收野無積庾廩糧則不屬無所
安取恐津梁之不通勞軍紆吾糧道吾聞先生明於時
交察於道理恐動而無功故問其道計倪對曰是固不
可興師者必先蓄積食錢布帛不先蓄積士卒數饑饉
則易傷重遲不可戰戰則耳目不聰明耳不能聽視不
能見什部之不能使退之不能解進之不能行饑饉不
可以動神氣去而萬里伏弩而乳郅頭而皇皇彊弩不
穀發不能當旁軍見弱走之如犬逐羊靡從部分伏地

而死前頓後僵與人同時而戰獨受天之殃未必天之罪也亦在其將王興師以年數恐一旦而亡失邦無明筋骨為野越王曰善請問其方吾聞先生明於治歲萬物盡長欲聞其治術可以為教常子明以告我寡人弗敢忘計倪對曰人之生無幾必先憂積蓄以備妖祥凡人生或老或弱或彊或怯不早備生不能相葬王其審之必先省賦斂勸農桑饑饉在問或水或塘因熟積以備四方師出無時未知所當應變而動隨物常羊卒然

有師彼日以弱我日以彊得世之和擅世之陽王無忽
忘慎無如會稽之饑不可再更王其審之嘗言息貨王
不聽臣故退而不言處於吳楚越之間以魚三邦之利
乃知天下之易反也臣聞君自耕夫人自織此竭於庸
力而不斷時與智也時斷則循智斷則備知此二者形
於體萬物之情短長逆順可觀而已臣聞炎帝有天下
以傳黃帝黃帝於是上事天下治地故少昊治西方蚩
尤佐之使主金玄冥治北方白辯佐之使主水太皞治

東方素何佐之使主木祝融治南方僕程佐之使主火
后土治中央后稷佐之使主土竝有五方以為綱紀是
以易地而輔萬物之常王審用臣之議大則可以王小
則可以霸於何有哉越王曰請問其要計倪對曰太陰
三歲處金則穰三歲處水則毀三歲處木則康三歲處
火則旱故散有時積糴有時領則決萬物不過三歲而
發矣以智論之以決斷之以道佐之斷長續短一歲再
倍其次一倍其次而反水則資車旱則資舟物之理也

天下六歲一穰六歲一康凡十二歲一饑是以民相離也故聖人早知天地之反為之預備故湯之時比七年旱而民不饑禹之時比九年水而民不流其主能通習源流以任賢使能則轉轂乎千里外貨可來也不習則百里之內不可致也人主所求其價十倍其所擇者則無價矣夫人主利源流非必身為之也視民所不足及其有餘為之命以利之而來諸侯守法度任賢使能償其成事傳其驗而已如此則邦富兵彊而不衰矣羣臣無

空恭之禮淫佚之行務有於道術不習源流又不任賢使能諫者則誅則邦貧兵弱刑繁則羣臣多空恭之禮淫佚之行矣夫諛者反有德忠者反有刑去刑就德人之情也邦貧兵弱致亂雖有聖臣亦不諫也務在諛主而已矣今夫萬民有明父母亦如邦有明主父母利源流明其法術以任賢子徽成其事而已則家富而不衰矣不能利源流又不任賢子賢子有諫者憎之如此者不習於道術也愈信其意而行其言後雖有敗不自過

也夫父子之為親也非得不諫諫而不聽家貧致亂雖有聖子亦不治也務在於諛之而已父子不和兄弟不調雖欲富也必貧而日衰越王曰善子何年少於物之長也計倪對曰人固不同惠種生聖癡種生狂桂實生桂桐實生桐先生者未必能知後生者未必不能明是故聖主置臣不以少長有道者進無道者退愚者日以退聖者日以長人主無私賞者有功越王曰善論事若是其審也物有妖祥乎計倪對曰有陰陽萬物各有紀

綱日月星辰刑德變為吉凶金木水火土更勝月朔更
建莫主其常順之有德逆之有殃是故聖人能明其刑
而處其鄉從其德而避其衡凡舉百事必順天地四時
參以陰陽用之不審舉事有殃人生不如臥之頃也欲
變天地之常數發無道故貧而命不長是聖人并苞而
陰行之以感愚夫衆人容容盡欲富貴莫知其鄉越王
曰善請問其方計倪對曰從寅至未陽也太陰在陽歲
德在陰歲美在是聖人動而應之制其收發當以太陰

在陰而發陰且盡之歲亟賣六畜貨財以益收五穀以應陽之至也陽且盡之歲亟發糶以收田宅牛馬積斂貨財聚棺木以應陰之至也此皆十倍者也其次五倍天有時而散是故聖人反其刑順其衡收聚而不散越王曰善今歲比熟尚有貧乞者何也計倪對曰是故不
等猶同母之人異父之子動作不同術貧富故不等如此者積負於人不能救其前後志意侵下作務日給非有道術又無上賜貧乞故長久越王曰善大夫侏同苦

成嘗與孤議於會稽石室孤非其言也今大夫言獨與
孤比請遂受教焉計倪曰糴石二十則傷農九十則病
末農傷則草木不辟末病則貨不出故糴高不過八十
下不過三十農末俱利矣故古之治邦者本之貨物官
市開而至越王曰善計倪乃傳其教而圖之曰審金木
水火別陰陽之明用此不患無功越王曰善從今以來
傳之後世以為教乃著其法治救江南七年而禽吳也
甲貨之戶曰染為上物賈七十乙貨之戶曰黍為中物

石六十兩貨之戶曰赤豆為下物石五十丁貨之戶曰
稻粟令為上種石四十戊貨之戶曰麥為中物石三十
己貨之戶曰大豆為下物石二十庚貨之戶曰穡比蔬
食故無賈辛貨之戶曰菓比蔬食無賈壬癸無貨

吳越春秋越王深念永思惟欲伐吳乃請計硯問曰吾
欲伐吳恐不能破早欲興師惟問於子計硯對曰夫興
師舉兵必且內蓄五穀實其金銀滿其府庫勵其甲兵
凡此四者必察天地之氣原於陰陽明於孤虛審於存

亡乃可量敵越王曰天地存亡其要奈何計硯曰天地之氣物有死生原陰陽者物貴賤也明孤虛者知會際也審存亡者別真偽也越王曰何謂死生真偽乎計硯曰春種八穀夏長而養秋成而聚冬蓄而藏夫天時春生而不救種是一死也夏長無苗二死也秋成無聚三死也冬藏無蓄四死也雖有堯舜之德無如之何夫天時有生勸者老作者少反氣應數不失厥理一生也留意省察謹除苗穢穢除苗盛二生也前時設備物至則

收國無逋稅民無失穗三生也倉已封塗除陳入新君
樂臣歡男女及信四生也夫陰陽者太陰所居之歲留
息三年貴賤見矣夫孤虛者謂天門地戶也存亡者君
之道德也越王曰何子之年少於物之長也計硯曰有
美之士不拘長少越王曰善哉子之道也乃仰觀天文
集察緯宿歷象四時以下著上虛設八食從陰收著望
陽出糶筭其極計三年五倍越國熾富句踐歎曰吾之
霸矣善計硯之謀也

史記昔者越王句踐困於會稽之上乃用范蠡計然計然曰知鬪則修備時用則知物二者形則萬貨之情可得而觀已故歲在金穰水毀木饑火旱旱則資舟水則資車物之理也六歲穰六歲旱十二歲一大饑夫糶二十病農九十病末末病則財不出農病則草不辟矣上不過八十下不減三十則農末俱利平糶齊物關市不乏治國之道也積著之理務完物無息幣以物相貿易腐敗而食之貨勿留無敢居貴論其有餘不足則知貴

賤貴上極則反賤賤下極則反貴貴出如糞土賤取如

珠玉財幣欲其行如流水修之十年國富厚賂戰士士

赴矢石如渴得飲遂報彊吳觀兵中國稱號五霸范子計然

計然者葵丘濮上人姓辛字文子其先晉國公子也為人

有內無外形狀似不及人少而明學陰陽見微而知

著其行浩浩其志汎汎不肯自顯諸侯陰取所利者七

國天下莫知故稱曰計然時遊遊海澤號曰漁父范蠡

請見越王計然曰越王為人烏喙不可同利也范子

問何用九宮計然曰陰陽之道非獨於一物也聖人之

變如水隨形形平則平形險則險五穀者萬民之命

國之重寶故無道之君及無道之民不能積其盛有餘

之時以待其衰不足也德

取象於春夏刑取象於秋冬

史記卷八十五 五十七

左傳

九年

秋吳城邗溝通江淮

越絕書百尺瀆
秦江吳以達糧

國語四年王召范蠡而問焉曰先人就世不穀即位吾年既少未有恒常出則禽荒入則酒荒吾百姓之不圖惟舟與車上天降禍於越委制於吳吳人之那不穀亦又甚焉吾欲與子謀之其可乎范蠡對曰未可也蠡聞之上帝不考時反是守疆索者不祥得時不成反受其殃失德滅名汜走死亡有奪有予有不予王無蚤圖夫吳君王之吳也王若蚤圖之其事又將未可知也王曰

諾

○反國四年
魯哀九年也

吳越春秋越王謂大夫種曰孤聞吳王淫而好色惑亂
沈湎不領政事因此而謀可乎種曰可破夫吳王淫而
好色宰嚭佞以曳心往獻美女其必受之惟王選擇美
女二人而進之越王曰善乃使相者國中得苧蘿山鬻
薪之女曰西施鄭旦飾以羅縠教以容步習於土城臨
於都巷三年學服而獻於吳乃使相國范蠡進曰越王
句踐竊有二遺女越國洿下困迫不敢稽留謹使臣蠡

獻之大王不以鄙陋寢容願納以供箕帚之用吳王大
說曰越貢二女乃句踐之盡忠於吳之證也子胥諫曰
不可王勿受也臣聞五色令人目盲五音令人耳聾昔
桀易湯而滅紂易文王而亡大王受之後必有殃臣聞
越王朝書不倦晦誦竟夜且聚敢死之士數萬是人
死必得其願越王服誠行仁聽諫進賢是人不死必成
其名越王夏被毛裘冬御絺綌是人不死必為對隙臣
聞賢士國之寶美女國之咎夏亡以妹喜殷亡以妲己

周亡以褒姒吳王不聽遂受其女

越絕書丘土城句踐所習教美女西施鄭

旦宮臺也女出於苧蘿山欲獻於吳自謂東垂僻陋恐女樸鄙故近大道居拾遺記越謀滅吳蓄天下奇寶

美人異味進於吳殺三牲以祈天地殺龍蛇以祠川岳矯以江南億萬戶民輸吳為傭保越又有美女二人一

名夷光一名修明以貢於吳吳處以椒華之房貫細珠為簾幌朝下以蔽景夕捲以待月二人當軒竝坐理鏡

親粧於珠幌之內竊窺者莫不動心驚魂謂之神人吳王妖惑忘政及越兵入國乃抱二女以逃吳苑越軍亂

入見二女在樹下皆言神女望而不敢侵今吳城鮑門內有朽株尚為祠神女之處述異記香水溪俗云西

施浴處人呼為脂粉塘吳王宮人濯粧於此溪上源至今馨香吳王夫差築姑蘇之臺三年乃成周旋詰屈

橫亘五里崇飾土木殫耗人力宮妓數千人上別立春宵宮為長夜之飲造千石酒鍾夫差作天池池中立青春

龍舟舟中盛陳妓樂日與西施為水嬉吳王於宮中作
海靈館館娃閣銅溝玉檻宮之楹檻珠玉飾之梧桐
園在吳宮本吳王夫差舊園也一名鳴琴川史記西
施越之美女越王句踐以獻之吳王夫差幸之每入市

人願見者先輸金錢一文

○孟子注疏引今本無

國語又一年王召范蠡而問曰吾與子謀吳子曰未可
也今吳王淫於樂而忘其百姓亂民功逆天時信讒喜
優憎輔遠弼聖人不出忠臣解骨皆曲相御莫適相非
上下相偷其可乎范蠡對曰人事至矣天應未也王姑
待之王曰諾

吳越春秋越王又問相國范蠡曰孤有報復之謀水戰則乘舟陸戰則乘輿輿舟之利頓於兵弩今子為寡人謀事莫不謬者乎范蠡對曰臣聞古之聖君莫不習戰用兵然行陣隊伍軍鼓之事吉凶決在其工今聞越有處女出於南林國人稱善願王請之立可見越王乃使使聘之問以劍戟之術處女將北見於王道逢一翁自稱曰袁公問於處女吾聞子善劍願一見之女曰妾不敢有所隱惟公試之於是袁公即杖篠簜竹竹枝上韻

橋末墮地女即捷末袁公則飛上樹變為白猿遂別去
見越王越王問曰夫劍之道則如之何女曰妾生深林
之中長於無人之野無道不習不達諸侯竊好擊之道
誦之不休妾非受於人也而忽自有之越王曰其道如
何女曰其道甚微而易其意甚幽而深道有門戶亦有
陰陽開門閉戶陰衰陽興凡手戰之道內實精神外示
安儀見之似好婦奪之似懼虎布形候氣與神俱往杳
之若日偏如騰兔追形逐影光若彷彿呼吸往來不及

法禁縱橫逆順直復不聞斯道者一人當百百人當萬
王欲試之其驗即見越王即加女號號曰越女乃命五
板之墮長高習之教軍士當世勝越女之劍於是范蠡
復進善射者陳音音楚人也越王請音而問曰孤聞子
善射道何所生音曰臣楚之鄙人嘗步於射術未能悉
知其道越王曰然願子一二其辭音曰臣聞弩生於弓
弓生於彈彈起古之孝子越王曰孝子彈者奈何音曰
古者人民朴質饑食鳥獸渴飲霧露死則裹以白茅投

於中野孝子不忍見父母為禽獸所食故作彈以守之
絕鳥獸之害故歌曰斷竹續竹飛土逐害之謂也於是
神農黃帝弦木為弧剡木為矢弧夫之利以威四方黃
帝之後楚有弧父弧父者生於楚之荆山生不見父母
為兒之時習用弓矢所射無脫以其道傳於羿羿傳逢
蒙逢蒙傳於楚琴氏琴氏以為弓矢不足以威天下當
是之時諸侯相伐兵刃交錯弓矢之威不能制服琴氏
乃橫弓着臂施機設樞加之以力然後諸侯可服琴氏

傳之楚三侯所謂句亶鄂章人號廉侯翼侯魏侯也自楚之三侯傳至靈王自稱之楚累世蓋以挑弓棘矢而備鄰國也自靈王之後射道分流百家能用莫得其正臣前人受之於楚五世於臣矣臣雖不明其道惟王試之越王曰弩之狀何法焉陳音曰郭為方城守臣子也教為人君命所起也牙為執法守吏卒也牛為中將主內裏也闕為守禦檢去止也錡為侍從聽人主也臂為道路通所使也弓為將軍主重負也弦為軍師禦戰

士也夫為飛客主教使也金為實闕不止也衛為副

使正道里也又為受教知可否也縹為都尉執左右也
敵為百死不得駭也鳥不及飛獸不暇走弩之所向無
不死也臣之愚劣道悉如此越王曰願聞正射之道音
曰臣聞正射之道道衆而微古之聖人射弩未發而前
名其所中臣未能如古之聖人請悉其要夫射之道身
若戴板頭若激卵左蹠右足橫左手若附枝右手若抱
兒舉弩望敵翕心咽煙與氣俱發得其和平神定思去

去止分離右手發機左手不知一身異教其况雄雌此
正射持弩之道也願聞望敵儀表投分飛矢之道音曰
夫射之道從分望敵合以參連弩有斗石矢有輕重石
取一兩其數乃平遠近高下求之銖分道女在斯無有
遺言越王曰善盡子之道願子悉以教吾國人音曰道
出於天事在於人人之所習無有不神於是乃使陳音
教士習射於北郊之外三月軍士皆能用弓弩之巧陳
音死越王傷之葬於國西號其葬所曰陳音山


拾遺記
越王句

踐使工人以白馬白牛祠昆吾之神採金鑄之以成八
劍之精一名拚日以之指日則光晝暗金陰也陰盛則
陽滅二名斷水以之劃水開即不合三名轉魄以之指
月蟾兔為之倒轉四名懸翦飛鳥遊過觸其刃如斬截
馬五名驚鯢以之泛海鯨鯢為之深入六名滅魂扶之
夜行不逢魑魅七名卻邪有妖魅者見之則伏八名真
剛以切玉斷金如削土木矣以應八方之氣鑄之也其
山有獸大如兔毛色如金食土下之丹石深穴地以為
窟亦食銅鐵膽腎皆如鐵其雌者色白如銀昔吳國武
庫之中兵刃鐵器俱被食盡而封署依然王令檢其庫
穴獵得雙兔一白一黃殺之開其腹而有鐵膽腎方知
兵刃之鐵為兔所食王乃召其劍工令鑄其膽腎以為
劍一雌一雄號干將者雄號鑊者雌其劍可以切玉
斷犀王深寶之遂霸其國越絕書麻林山一名多山
白踐欲伐吳種麻以為弓絃使齊人守之越謂齊人多
故曰麻林多以防吳以山下田封功臣射浦者句踐

教習兵處也射卒陳音死葬民西故曰陳音山獨婦
山者句踐將伐吳徙寡婦致獨山上以為死士示得專
一也後之說者蓋句踐所以遊軍士也防焉者越所
以遏吳軍也雞山豕山者句踐以畜雞豕將伐吳以
食士也浙江南路西城者范蠡敦兵城也其陵固可
守故謂之固陵舟室者句踐船宮也石塘者越所
害軍船也塘廣六十五步長三百五十三步杭塢者
句踐杭也二百石長員卒七士人度之會夷巫里句
踐所徙巫為一里巫山者越魑神巫之官也死葬其
上江東中巫葬者越神巫無杜子孫也死句踐於中
江而葬之巫神欲使覆禍吳人船述異記句踐得范
蠡之謀乃示民以耕桑延四方之士作臺於外而館賢
士今會稽山有越王臺今交州麻林一名紵林句踐種
麻將以弦弓交州糠頭山句踐貯米於其上春積糠為
山今會稽之上有越王鑄劍洲箭鏃洲往往有得古箭
鏃蓋古制也越絕書越王句踐反國六年皆得士民

之衆而欲伐吳於是乃使之維甲維甲者治甲系斷修
內矛赤雞稽繇者也越人謂人鍛也方舟航買儀塵者
越人姓如江也治須慮者越人謂船為須慮亟怒紛紜
者怒貌也怒至士學高文者躍勇士也習之於夷夷海
也宿之於茶菜野也致之於單單者堵也搜神記吳
王夫差小女名曰紫玉年十八童子韓重年十九有道
術女說之私交信問許為之妻重學於齊魯之間屬其
父母求婚王怒不與女玉結氣死墓閭門之外三年重
歸哭泣哀慟具牲幣往弔於墓前玉魂從墓出見重流
涕曰昔爾行之後二親從王相求度必克從大願不圖
別後遭命奈何乃左顧宛頭而歌曰南山有鳥北山張
羅鳥既高飛羅將奈何意欲從君讒言孔多悲結生疾
沒命黃墟命之不造冤如之何羽族之長名為鳳凰一
日失雄三年感傷雖有衆鳥不為匹雙故見鄙妾逢君輝
光身遠心近何當暫忘歌畢歔流涕要重還冢與之
飲讌留三日三夜盡夫婦之禮取徑寸明珠以送重曰

若至吾家致敬大王重遂詣王自說其事王大怒曰吾女既死而重造訛言此不過發冢取物託以鬼神趣收重重走至墓所訴之玉曰無憂今歸白玉王粧梳忽見玉驚愕悲喜問曰爾緣何生玉跪而言曰昔韓重求玉大王不許重從遠還聞玉已死故詣冢弔唁感其篤終輒與相見因以珠遺之不為發冢願勿推治夫人聞之出而抱之玉如烟然



繹史卷九十六上